



STINAPA TA INFORMA

KIKO TA

ESPESIENAN ENDÉMIKO, KRIOYO, EKSÓTIKO I INTRODUSÍ?

Promé artíkulo tokante eliminashon di espesienan eksótiko i kontròl den Parke Nashonal Washington Slagbaai (PNWS) Pa por komprondé e proseso ku ta tumando lugá den PNWS kompletamente, ta mihó pa splika algun konsepto i definishon básiko. P'esei e artíkulo aki lo no duna e definishonnan sientífiko, pero nos lo usa palabranan simpel i ehèmpelnan fásil pa splika nifikashon di sierto terminologia.

- **Endémiko:** Un espesie di mata òf animal ku por haña SOLAMENTE den un sierto área. Un espesie por ta endemiko pa un isla, òf un pais, un estado, un parke nashonal, òf den sierto kaso ménos agradabel, solamente "preso". Na Boneiru nos tin algun para i rèptil endemiko, por ehèmpel e lora i e lagadishi di palu.

- **Krioyo (Nativo):** Un espesie di mata òf animal ku a aparesé, sobreviví, adaptá i evolushoná (kambio den genétika) den un área spesífiko òf un sistema ekológiko, te ora el a yega den un sierto balanse ku otro espesienan. E espesie por a okurí naturalmente den e área, òf por a yega na un manera natural den e área (por ehèmpel ku bientu òf via laman riba palu ku ta drif) for di un otro sitio. Esaki ta e kaso ku mayoría di e espesienan krioyo na Boneiru. Pero, bo mester tene kuenta! No ta tur espesie ku bo ta mira rònt di bo ta krioyo. Por ta ni esnan ku bo mayornan òf abuelonan a lanta kuné ta krioyo. Den tempu biológiko, un par di shen aña òf asta un par di mil aña ta nifiká nada. E echo ku un sierto espesie tabata den un área pa un par di shen aña no ta nifiká ku un espesie ta krioyo òf ta den balanse ku e naturalesa den su besindario.

- **Eksótiko:** Un espesie di mata òf animal ku ta pertenesé otro kaminda, ku di un manera òf otro a logra aparesé den un habitat òf medioambiente nobo. Ku otro palabra: ku no ta pertenesé den e medioambiente ku ta rondon'é. Unabes introdusí, un espesie eksótiko tin kuater opshon. E por desaparecé (pasobra e no a logra di adaptá), e por bira krioyo (e ta drenta den balanse ku e medioambiente ku ta rondon'é). E por invadí (e ta kousa daño na poblashonnan krioyo dor di usa nan rekursionan òf dor di ataká nan direktamente), òf e por bira un peliger (dor di kousa molèster na poblashonnan lokal te na e punta di menasá nan ku ekstraditá, strobando e balanse den e sistema ekológiko).

- **Introdusí:** Un animal òf mata ku a ser poné den un área kaminda nunca e no por a yega riba su propio forsa. E introdukshon por ta intensional òf no intensional. Por ehèmpel: e djakanan ku a bin den barku for di Europa ta un introdukshon no intensional. Buriku di otro banda, ta un ehèmpel di un introdukshon intensional. Hende tin diferente motibu pa introdusí mata òf animal unda ku nan bai; pa nan por kome (kabritu, porko, galiña, palu di fruta), trabou duru i transporte (buriku, kabai), bestia di kas (kachó, pushi, kolebra, para), material (sierto tipo di palu pa konstrukshon), produkto (álue, mata di rùber), kòntrol di bestia molestioso (pushi pa djaka), bestia di kas pa dekorashon (trupial) etc.

Skirbí pa Fernando Simal, tradusí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURESA



Traha huntu na un desaroyo duradero pa Boneiru